

## প্রথম বার্ষিক সাধারণ সভার কার্যবিবরণী

- ১। বিগত ১৫ই জানুয়ারি, ২০১৬ ইং তারিখে ১৭ কাজী নজরুল ইসলাম এভিনিউ, ঢাকাস্থ বিশ্বসাহিত্য কেন্দ্রের মিলনায়তনে উইকিমিডিয়া বাংলাদেশ ফাউন্ডেশনের প্রথম বার্ষিক সাধারণ সভা অনুষ্ঠিত হয়। ফাউন্ডেশনের অন্তর্বর্তীকালীন নির্বাহী পরিষদের সভাপতি মুনির হাসানের সভাপতিত্বে সভার কার্যক্রম শুরু হয়। সভায় মোট ২৭ জন সাধারণ সদস্য উপস্থিত ছিলেন। উপস্থিত সদস্যদের তালিকা পরিশিষ্ট-ক-এ দেখা যাবে।
- ২। সভাপতি উপস্থিত সকল সদস্যকে স্বাগত জানিয়ে প্রথম সাধারণ সভার প্রেক্ষাপট তুলে ধরেন। তিনি জানান উইকিমিডিয়া বাংলাদেশ, উইকিমিডিয়া ফাউন্ডেশনের স্বীকৃতি ২০১১ সালে পেলেও বাংলাদেশে আইনি স্বীকৃতি পেতে পেতে ২০১৪ সাল হয়ে যায়। এর পর ব্যাংক একাউন্ট ও অন্যান্য আনুষ্ঠানিকতা শেষে প্রথম বার্ষিক সভা আহবান করা হয়েছে। এরপর সদস্য নুরুন্নবী চৌধুরী (হাছিব) প্রথম বার্ষিক সাধারণ সভায় সভাপতিত্ব করার জন্য মুনির হাসানের নাম প্রস্তাব করেন, এতে সমর্থন জানান সুব্রত রায় এবং উপস্থিত সকলেই সম্মতি জ্ঞাপন করেন। সভাপতি নির্বাচিত হবার পর সভাপতি সভার কার্যক্রম শুরু করেন।
- ৩। আলোচ্যসূচী ১ : সাধারণ সভার আলোচ্য সূচী নির্ধারণ :

সভাপতি জানান যেহেতু এটি সংগঠনের প্রথম বার্ষিক সভা এবং যেহেতু একটি অন্তর্বর্তীকালীন কমিটি এতদিন কাজ করেছে তাই সাধারণ সভার একটি আবশ্যিক বিষয় চূড়ান্ত আলোচনা করা যাবে না। অন্তর্বর্তীকালীন কমিটি আগামীদিনের কর্মপরিকল্পনা প্রণয়ন না করে সেটি পরবর্তী নির্বাহী কমিটির জন্য মূলতবী রেখেছে। কাজেই এই বিষয়ছাড়া অন্যান্য বিষয় আলোচনা করা যাবে। আলোচনার প্রেক্ষিতে সভার আলোচ্যসূচী হিসাবে নিম্নোক্ত বিষয়গুলো নির্ধারণ করা হয় :

  ১. সভাপতি ও আলোচ্য সূচী নির্ধারণ,
  ২. উইকিমিডিয়া বাংলাদেশের বিগত বছরগুলোর কার্যক্রমের বিবরণী ও আলোচনা,
  ৩. আর্থিক বিবরণী উত্থাপন ও আলোচনা,
  ৪. ২০১৬-২০১৭ মেয়াদের নির্বাহী পরিষদের সদস্য নির্বাচন,
  ৫. বিবিধ আলোচনা,
  ৬. সমাপ্তি
৪. আলোচ্য সূচী ২ : ২. উইকিমিডিয়া বাংলাদেশের বিগত বছরগুলোর কার্যক্রমের বিবরণী ও আলোচনা।

৪.১ উইকিমিডিয়া বাংলাদেশের অন্তর্বর্তীকালীন নির্বাহী পরিষদের সাধারণ সম্পাদক তানভির রহমানের অনুপস্থিতিতে তার অনুরোধে বিগত বছরগুলোর (২০১১ থেকে ২০১৫) কর্মকাণ্ডের বিবরণ পেশ করেন অন্তর্বর্তী নির্বাহী পরিষদের সদস্য তানভির মোর্শেদ। তানভির মোর্শেদ সভাকে জানান :

  - ২০১১ সালে বাংলাদেশী উইকিপিডিয়ানরা ব্লগারদের জন্য একটি উইকিপিডিয়া কর্মশালার আয়োজন করেন। এছাড়া, ২০১১ সালের ১৫ই জানুয়ারি উইকিপিডিয়ার দশম প্রতিষ্ঠাবার্ষিকী ঘুড়ি উৎসবসহ অন্যান্য আয়োজনের মাধ্যমে পালন করা হয়। তিনি আরো জানান, ঢাকাতে উইকিপিডিয়ানদের দুটি মিট-আপ অনুষ্ঠিত হয়। একই বছরের ৩রা অক্টোবর বাংলাদেশে উইকিমিডিয়া ফাউন্ডেশনের কার্যক্রমগুলো পরিচালনার জন্য উইকিমিডিয়া ফাউন্ডেশনের চ্যান্সার কমিটি (বর্তমানে এফকম) উইকিমিডিয়া বাংলাদেশ চ্যান্সার অনুমোদন করে।





**WIKIMEDIA**  
BANGLADESH

- ২০১২ সালে ঢাকা ও দিনাজপুরে দুটি পৃথক উইকিপিডিয়া আড্ডার আয়োজন করা হয়। একই বছরের মার্চে চট্টগ্রামের ইন্ডিপেন্ডেন্ট ইউনিভার্সিটিতে দুইদিনব্যাপী একটি উইকিপিডিয়া অ-সম্মেলনের আয়োজন করা হয় যেখানে উপস্থিত ছিলেন বিজ্ঞান ও তথ্য প্রযুক্তি বিষয়ক মাননীয় প্রতিমন্ত্রী হুপতি ইয়াফেস ওসমান, বিশিষ্ট শিক্ষাবিদ অধ্যাপক মুহম্মদ জাফর ইকবাল প্রমুখ। এছাড়াও, ২০১২ সালের মে মাসে স্থানীয় অনুমোদনের জন্য উইকিমিডিয়া বাংলাদেশের পক্ষ থেকে বাংলাদেশ সরকারের কাছে আবেদন করা হয়।
- ২০১৩ সালে ২১শে ফেব্রুয়ারি বইমেলায় সামনে উইকিপিডিয়ার প্রচারণার জন্য ব্যানার নিয়ে অবস্থান কর্মসূচি পালন করা হয়। এ বছরই প্রথমবারের মত উইকিমিডিয়া বাংলাদেশের পক্ষ থেকে ঢাকার ইউনিভার্সিটি অব ইনফরমেশন এন্ড সায়েন্সেস-এ উইকিপিডিয়া কর্মশালার আয়োজন করা হয়। একই বছরের নভেম্বরে উইকিমিডিয়া ফাউন্ডেশনের মোবাইল কর্মসূচির পরিচালক ক্যারোলিন স্লেগডার বাংলাদেশে আসেন ও 'উইকিপিডিয়া জিরো' কর্মসূচির উদ্বোধন করেন। এছাড়াও নিয়মিতভাবে উইকি-আড্ডা, ইফতারসহ অন্যান্য কর্মকাণ্ডগুলো পরিচালিত হয়।
- ২০১৪ সালে বাংলাদেশে উইকিপিডিয়ার প্রচারণামূলক কর্মকাণ্ড উল্লেখযোগ্য হারে বৃদ্ধি পায়। এ বছরই বাংলা উইকিপিডিয়া দশ বছরে পদার্পণ করে এবং এ উপলক্ষ্যে বিভিন্ন কর্মসূচি হাতে নেওয়া হয়। সিরিজ এ কর্মসূচির আওতায় ছিল, দেশের সাতটি বিভাগের সাতটি বিশ্ববিদ্যালয়ে উইকিপিডিয়া কর্মশালা, উইকিপিডিয়া স্কুল কর্মসূচি, উইকিপিডিয়া ফটোগ্রাফি ও বাংলা উইকিপিডিয়া ফটোগ্রাফি প্রতিযোগিতা। এ ধারাবাহিক আয়োজনে উইকিমিডিয়া বাংলাদেশকে পৃষ্ঠপোষকতা করে টেলিকম প্রতিষ্ঠান গ্রামীণফোন। উইকিমিডিয়া বাংলাদেশ ও গ্রামীণফোনের যৌথ একটি সংবাদ সম্মেলনের মাধ্যমে শুরু হয় এ আয়োজন। এছাড়াও, ২০১৪-এর ফেব্রুয়ারিতে গ্রামীণফোনের প্রধান কার্যালয়ে ইন্টারনেট জিনিয়াসদের (আই জিনিয়াস) নিয়ে দুইদিনব্যাপী উইকিপিডিয়ার কন্ট্রিবিউটর'স ডে অনুষ্ঠিত হয়। এ বছর আরও একটি উল্লেখযোগ্য অর্জন ছিল, উইকিমিডিয়া ইউকের সাথে উইকিমিডিয়া বাংলাদেশের কোলাবোরেশন। যেখানে যুক্তরাজ্যে বাংলাদেশী কমিউনিটিকে কিভাবে উইকিপিডিয়ায় আগ্রহী করে তোলা যায় সে ব্যাপারে আলোচনা হয়। এছাড়াও, এ বছরের ১০ই জুন উইকিমিডিয়া বাংলাদেশ সরকারের কাছ থেকে স্থানীয়ভাবে অপারেট করার জন্য অনুমোদন লাভ করে।
- ২০১৫ সালের ফেব্রুয়ারিতে বাংলা উইকিপিডিয়ার দশম প্রতিষ্ঠাবার্ষিকীতে উইকিপিডিয়ার সহ-প্রতিষ্ঠাতা জিমি ওয়েলস ঢাকার রেডিসনে অনুষ্ঠিত সম্মেলনে যোগদান করেন। এটিই জিমি ওয়েলসের প্রথম বাংলাদেশ সফর। এ অনুষ্ঠানটিতে সহযোগিতা করে গ্রামীণফোন। এ বছরের মাঝামাঝিতে অনুষ্ঠিত হয় বাংলা উইকিপিডিয়ার দ্বিতীয় সম্মেলন যেখানে অতিথি হিসেবে উপস্থিত ছিলেন বাংলাদেশ সরকারের মাননীয় আইসিটি বিষয়ক প্রতিমন্ত্রী জুনাইদ আহমেদ পলক ও লেখক-সাংবাদিক আনিসুল হক। এটি ঢাকার ড্যাফোডিল ইন্টারন্যাশনাল ইউনিভার্সিটিতে অনুষ্ঠিত হয়। এ আয়োজনগুলো ছাড়াও দেশের দশটি স্কুলে অনুষ্ঠিত হয় উইকিপিডিয়া স্কুল প্রোগ্রাম। যেখানে স্কুলের শিক্ষার্থীদের উইকিপিডিয়া পড়ার ব্যাপারে উৎসাহ প্রদান করা হয়।
- তানভির মোর্শেদের উপস্থাপিত প্রতিবেদনটি পরিশিষ্ট-খ'তে দেওয়া হলো। বিবরণী পেশ করার পর সভায় উপস্থিত সদস্যগণ তানভির মোর্শেদসহ কর্মকাণ্ড পরিচালনায় দ্বায়িত্বপালনকারীদের ধন্যবাদ জানান এবং সদস্যগণ মৌখিকভাবে প্রতিবেদনটি অনুমোদন করেন।



**WIKIMEDIA**  
**BANGLADESH**

৪.২ সভার সভাপতি বিগত বছরগুলোর কর্মকান্ড ও ভবিষ্যৎ কর্মপরিকল্পনার ওপর উন্মুক্ত আলোচনার জন্য উপস্থিত সদস্যদের আহ্বান জানান। নিম্নোক্ত সদস্যগণ আলোচনায় অংশ নেনঃ

নাহিদ সুলতান : তানভির মোর্শেদকে কর্মকাণ্ডের বিবরণী পেশ করার জন্য ধন্যবাদ দিয়ে বলেন, এসব কর্মকাণ্ড পরিচালনার জন্য উইকিমিডিয়া বাংলাদেশের আরও সক্রিয় স্বেচ্ছাসেবক প্রয়োজন। তিনি উপস্থিত সদস্যদের অফলাইন কর্মকাণ্ডে আরও সক্রিয় হওয়ার আহ্বান করেন।

শাহনেওয়াজ রবি : বাংলাদেশের বিশ্ববিদ্যালয়গুলোতে উইকিপিডিয়ার টিম গঠন এবং উইকিপিডিয়া নিয়ে দলগত কাজ করতে উৎসাহ বাড়ানোর কার্যক্রমের প্রস্তাব করেন।

শাহাদাত হোসেন : উইকিপিডিয়ার সাহায্য সংক্রান্ত ভিডিও টিউটোরিয়াল নির্মাণের প্রস্তাব করেন। তিনি বলেন, অনেক সময় অনলাইন টিউটোরিয়াল খুঁজে পাওয়া যায় না সেক্ষেত্রে ভিডিও টিউটোরিয়াল ব্যবহারকারীদের আরও বেশি কাজে আসবে।

রিফাত জামিল ইউসুফজাই : নিবন্ধের ক্ষেত্রে শুধুমাত্র অনলাইন রেফারেন্সের ওপর নির্ভর না করে অফলাইন রেফারেন্সের ওপরও জোর দেওয়ার প্রস্তাব করেন। সেক্ষেত্রে তিনি বিভিন্ন বই, জার্নাল ও প্রকাশনা থেকে রেফারেন্স সংগ্রহের কথা বলেন। প্রয়োজনে দলবেঁধে পাবলিক বা বিশ্ববিদ্যালয় লাইব্রেরিতে কাজ করার উদ্যোগের প্রস্তাব করেন তিনি।

নাঈয়া হোসেন : বাংলা উইকিপিডিয়ার মোবাইল অ্যাপস তৈরির প্রস্তাব দেন যা অফলাইনেও ব্যবহার করা যাবে।

সুব্রত রায় : নাজিয়া হোসেনের প্রস্তাবে উইকিপিডিয়ার অফলাইন Kiwix ব্যবহারের পরামর্শ দেন। এছাড়া পত্রিকায় উইকিপিডিয়ার প্রচারণা বাড়ানোর জন্য প্রস্তাব করেন।

শাহরিয়ার কবির পাভেল : উইকিপিডিয়া সম্পর্কিত সেমিনার আয়োজন ও নারীদের অংশগ্রহণ বৃদ্ধিকরণের উপর গুরুত্বারোপ করেন এবং এ ব্যাপারে কমিটিকে প্রয়োজনীয় পদক্ষেপ নেওয়ার পরামর্শ দেন। এর সাথে সাথে উইকিপিডিয়াতে প্রয়োজনীয় নিবন্ধের মানোন্নয়নের কথাও বলেন। এ বিষয়ে মইনুল ইসলাম মন্তব্য করেন, উইকিপিডিয়া যেহেতু বৈশ্বিক তাই এর বিষয়বস্তু ও দৃষ্টিভঙ্গী উভয়ই বৈশ্বিক হওয়া উচিত।

ইকবাল হোসেন : নতুন ব্যবহারকারীদের সাহায্যের জন্য ভিডিও টিউটোরিয়ালের প্রয়োজনীয়তার ওপর গুরুত্বারোপ করেন। এই মন্তব্যের পরিপ্রেক্ষিতে শাবাব মুস্তাফা জানান, ভিডিও টিউটোরিয়াল নির্মাণ সংক্রান্ত পরিকল্পনা ২০১০ সালে নেয়া হয়েছিল কিন্তু তখন প্রযুক্তিগত সীমাবদ্ধতার কারণে তা আর বাস্তবায়ন করা সম্ভব হয়নি। তবে তিনি বিষয়টির ওপর আবারো গুরুত্বারোপের আহ্বান জানান এবং আলী হায়দার খান তা সমর্থন করেন।

নাহিয়ান গুভ : ঢাকার পাশাপাশি খুলনাসহ দেশের বিভিন্ন অঞ্চলে অফলাইন কর্মকান্ড বৃদ্ধিকরণের প্রস্তাব করেন।

মোহাম্মদ গালিব হাসান : উইকিপিডিয়া কর্মশালাগুলোতে বিষয়ভিত্তিক প্রতিযোগিতার আয়োজনের পরামর্শ দেন যাতে উইকিপিডিয়াকে বিভিন্ন সময় গবেষণার কাজেও ব্যবহার করা যায়।

মো. মুশফিকুর রহমান : তিনি বলেন, অনেকেই এখনো অবগত নন যে, উইকিপিডিয়া যে কেউ সম্পাদনা করতে পারে। সেক্ষেত্রে তিনি প্রস্তাব করেন, সাধারণ মানুষের কাছে এই বার্তা পৌঁছাতে হবে যে, উইকিপিডিয়া যে কেউ সম্পাদনা করতে পারে।



মতিউর রহমান : স্কুল পর্যায়ের পাশাপাশি কলেজ এবং বিশ্ববিদ্যালয় পর্যায়ে বিভিন্ন কর্মশালা আয়োজনের পরিমাণ বৃদ্ধি করা প্রয়োজন। কারণ বিভিন্ন পরিসংখ্যানে দেখা যায়, কলেজ বা বিশ্ববিদ্যালয়ের শিক্ষার্থীরাই উইকিপিডিয়ায় বেশি সম্পাদনা করে থাকেন।

ফজলে রাব্বি : উইকিপিডিয়া কর্মশালাগুলোতে গবেষণাভিত্তিক বিভিন্ন প্রতিযোগিতার আয়োজন করার প্রস্তাব করেন।

অভিজিৎ দাস : তিনি উইকিপিডিয়া ছাড়াও উইকিমিডিয়া ফাউন্ডেশনের অন্যান্য প্রকল্প যেমন, উইকিসংকলন, উইকিবই, উইকিমিডিয়া কমন্সসহ অন্য প্রকল্পগুলোর প্রচারণা জোরদার করার প্রস্তাব করেন।

ইন্তেখার আলম : বিভিন্ন বিশ্ববিদ্যালয়ের পাঠাগারে সংরক্ষিত প্রাচীন পুঁথি সংগ্রহ করে উইকিসংকলনে সংরক্ষণ করার প্রস্তাব করেন। এ ব্যাপারে মূনির হাসান মন্তব্য করেন, ইতোমধ্যে সরকার প্রাচীন পুঁথি ডিজিটলাইজ করার একটি প্রকল্প গ্রহণ করেছে, কিন্তু প্রাচীন পুঁথিগুলো যেহেতু কপিরাইট মুক্ত তাই সরকার ডিজিটলাইজ করার পরও সেগুলো উইকিসংকলনে যুক্ত করা যাবে।

মাসুম আল হাসান : উইকিপিডিয়ার অবদানকারীদের সক্রিয়তা ধরে রাখার জন্য আরও বেশি পরিমাণে উইকি আড্ডার আয়োজন করার পরামর্শ দেন।

মোঃ আশরাফুজ্জামান সাগর : ঢাকার পাশাপাশি রাজশাহী ভিত্তিক উইকি আড্ডা, এডিট-এ-থন ইত্যাদি নিয়মিতকরণ করার প্রস্তাব করেন।

আরিফুল ইসলাম : উইকিপিডিয়ার প্রচারণা বৃদ্ধিকরণের জন্য বিশ্বসাহিত্য কেন্দ্রের মত বিভিন্ন জেলায় উইকিপিডিয়ার গাড়ি পাঠানোর ব্যবস্থা করার প্রস্তাব করেন।

শাহরিয়ার কাউসার মিশু : নিবন্ধের মানোন্নয়নের জন্য নিয়মিত অবদানকারীদের জন্য বিশেষ প্রশিক্ষণের ব্যবস্থা করার প্রস্তাব দেন।

অন্তিম সরকার : যেহেতু উইকিপিডিয়ার অবদানকারীদের মধ্যে অধিকাংশই শিক্ষার্থী সেহেতু তিনি ক্যাম্পাস ভিত্তিক প্রচারণা বৃদ্ধিকরণ করার প্রস্তাব করেন।

উপরোক্ত প্রস্তাবনাগুলো আমলে নিয়ে সভার সভাপতি প্রস্তাবগুলো নির্বাহী কমিটির সভায় আলোচনা পূর্বক বার্ষিক কর্মপরিকল্পনায় অন্তর্ভুক্ত করার সুপারিশ করেন এবং উপস্থিত সদস্যগণ হ্যাঁ-সূচক জবাব দিয়ে সেটি অনুমোদন করেন।

৫. আলোচ্য সূচী-৩ : আর্থিক বিবরণী উত্থাপন ও আলোচনা :

উইকিমিডিয়া বাংলাদেশের অন্তর্বর্তী নির্বাহী পরিষদের কোষাধ্যক্ষ আলী হায়দার খান (তময়) বিগত বছরগুলোর (২০১১ থেকে ২০১৫) আর্থিক বিবরণী পেশ করেন। তিনি জানান বিগত ২৪ই জুন ২০১৫ সালে ডাচ বাংলা ব্যাংকের এলিফ্যান্ট রোড শাখায় সংগঠনের নামে একটি একাউন্ট খোলা হয় যার নম্বর 126-110-0026748। গঠনতন্ত্র অনুসারে সভাপতি, সাধারণ সম্পাদক ও কোষাধ্যক্ষ একাউন্টের সিগনেটরি হওয়ার কথা থাকলেও সাধারণ সম্পাদকের অনুপস্থিতিতে বিগত ৩ এপ্রিল ২০১৫ সালে নির্বাহী পরিষদের একটি সভায় শাবাব মুস্তাফাকে, সাধারণ সম্পাদক তানভির রহমানের পরিবর্তে সিগনেটরি করার সিদ্ধান্ত হয়। সভায় চারটি সিদ্ধান্ত গ্রহণ করা হয়। সেগুলো হলো :

১. সাধারণ সম্পাদক তানভির রহমান দেশে নাই এজন্য তার অনুপস্থিতিতে শাবাব মুস্তাফা সিগনেটরি হবে।



## WIKIMEDIA BANGLADESH

২. সভাপতি মুনীর হাসান, কোষাধ্যক্ষ আলী হায়দার খান (তন্ময়) ও নির্বাহী সদস্য শাবাব মুস্তাফার স্বাক্ষরে একাউন্ট ওপেন করা হবে।
৩. একাউন্ট হবে ডাচ বাংলা ব্যাংকের ঢাকার এলিফ্যান্ট রোড শাখায়।
৪. একটি ডাচ বাংলা ব্যাংকের মোবাইল একাউন্টও খোলা হবে।

উপস্থিত সদস্যদের কাছে এব্যাপারে অনুমোদন চাওয়া হলে উপস্থিত সদস্যগণ মৌখিকভাবে প্রস্তাবনাটি অনুমোদন করেন।

আর্থিক বিবরণীর একটি সংক্ষিপ্তসার নিচে দেওয়া হলো :

ক্রমিক	বিবরণসমূহ	তারিখ	প্রাপ্তি (টাকা)	খরচ (টাকা)	ব্যালেন্স (টাকা)	ঋণ ও বাধ্যবাধকতা (টাকা)	টাকা পাওয়ার রসিদ আছে (হ্যাঁ/না)
১	স্টার কাবাবে উইকি ইফতার	০৮/০৪/২০১৩		৪,৬০০	২১,৭৫১		হ্যাঁ
২	উইকিসম্মিলনের জন্য ব্যানার ও স্ট্যান্ড	১০/২৭/২০১৩		১,৮৫০	১৯,৯০১		হ্যাঁ
৩	উইকিসম্মিলন-১৫ চা-পান	১১/০১/২০১৩		৮০	১৯,৮২১		না
৪	উইকিপিডিয়া জিরো সংবাদ সম্মেলনে খরচ				১৯,৮২১		
৫	ব্যানার	১১/১২/২০১৩		৭০০	১৯,১২১		হ্যাঁ
৬	খাবার	১১/১৩/২০১৩		৬,০০০	১৩,১২১		হ্যাঁ
৭	বেসিস মিলনায়তনে সাহায্যকারীদের প্রদান	১১/১৩/২০১৩		৫০০	১২,৬২১		না
৮	২১শে ফেব্রুয়ারি ২০১৪ তে উইকিসম্মিলন, চা-কপি	০২/২১/২০১৪		৫০০	১২,১২১		না
৯	আলী হায়দার খান থেকে ঋণ	০৬/০৯/২০১৪	৮১৭৯		২০,৩০০	৮১৭৯	না
১০	WMBD নিবন্ধনের জন্য বাকি সরকারি অর্থ (পরিমাণ বৃদ্ধি)	০৬/০৯/২০১৪		১০৩০০	১০,০০০		হ্যাঁ
১১	আইনি পরামর্শকের বাকী অর্থ	০৬/১০/২০১৪		১০০০০	০		হ্যাঁ

উপস্থিত সদস্যগণের সবাই হ্যাঁ-সূচক সম্মতি জ্ঞাপন করে বিবরণীটি অনুমোদন করেন।

বিবরণীটি পেশ করার পর, সদস্যগণের মধ্য থেকে আশিকুর রহমান শাওন উইকিমিডিয়া বাংলাদেশের ব্যাংক একাউন্ট পরিচালনার সুবিধার্থে মোবাইল ব্যাংকিং ও ইন্টারনেট ব্যাংকিং চালুর প্রস্তাব করেন। প্রস্তাবটি নতুন কমিটির কার্য তালিকায় লিপিবদ্ধ হবে বলে সিদ্ধান্ত হয়।

৬. ২০১৬-২০১৮ সালের নির্বাহী পরিষদের নির্বাচন : সদস্যদের নাম প্রস্তাব করে আলাপ আলোচনার মাধ্যমে উপস্থিত সদস্যদের মৌখিক সম্মতির মাধ্যমে নির্বাচন।

এ ব্যাপারে সভাপতি উপস্থিত সদস্যদের মতামত জানতে চাইলে সবাই নাম প্রস্তাবের মাধ্যমে নির্বাহী সদস্য নির্বাচনের পক্ষে সম্মতি জ্ঞাপন করেন। এরপর সভাপতি উপস্থিত সদস্যদের মধ্য থেকে আগ্রহী প্রার্থীদের নাম প্রস্তাবের আহবান জানান। প্রথমে আলী হায়দার খান (তন্ময়) নির্বাহী পরিষদের প্রার্থীতার জন্য ৯ জনের নাম প্রস্তাব করেন, তারা হলেন :

১. মুনীর হাসান,
২. তানভির রহমান,
৩. তানভির মোর্শেদ,
৪. নুরুন্নবী চৌধুরী (হাছিব),
৫. নাহিদ সুলতান,
৬. শাবাব মুস্তাফা,
৬. এ.কে. আল মহিউদ্দিন (মহীন রিয়াদ),
৭. মাসুম আল হাসান (রকি), এবং
৯. আলী হায়দার খান (তন্ময়)।

এই প্রস্তাবনার পর সভাপতি আরো কারও কোন প্রস্তাবনা রয়েছে কিনা তা জানতে চান। তখন নুরুন্নবী চৌধুরী (হাছিব) ও আর.কে.হান্নান নির্বাহী পরিষদের প্রার্থী হিসেবে যথাক্রমে নাসির খান (সৈকত) এবং মঈনুল ইসলামের নাম প্রস্তাব করেন। এরপর এই ১১ জন প্রার্থীর মধ্য থেকে কেউ প্রার্থীতা প্রত্যাহার করতে চান কিনা তা প্রার্থীদের প্রস্তাবক ও প্রার্থীদের কাছ থেকে সভাপতি জানতে চাইলে কেউ প্রার্থীতা প্রত্যাহার করে নাই। ফলে সভাপতি এই ১১ জন প্রার্থীকে নিয়ে নির্বাচনী আলোচনা শুরু করার আহবান জানান।

উপস্থিত সদস্যদের মধ্য থেকে মুশফিকুর রহমান সাধারণ সভায় অনুপস্থিত ২ জন প্রার্থী তানভির রহমান ও নাসির খান (সৈকত)কে বাদ দিয়ে উপস্থিত ৯ জনকে নির্বাচিত করার প্রস্তাব করেন। এই প্রস্তাবটি গ্রহণ করা হবে কিনা তা জানতে সভার সভাপতি উপস্থিত সদস্যদের কাছে জানতে চান এবং ২৭ জন সদস্যের মধ্যে ৩ জন এটি সমর্থন করেন; বাকীরা সমর্থন না করার ফলে প্রস্তাবটি বাতিল হয়ে যায়। তখন শাবাব মুস্তাফা প্রস্তাব করেন, প্রত্যেক প্রার্থীর উপর তাৎক্ষণিকভাবে উন্মুক্ত ভোটগ্রহণ করে সর্বোচ্চসংখ্যক সমর্থন প্রাপ্ত ৯ জন প্রার্থীকে নির্বাচিত করার। তবে প্রস্তাবিত পদ্ধতিটি উন্মুক্ত হওয়ায় আশিক শাওন, আর.কে.হান্নান, মো: আশরাফুজ্জামান সাগর ও সুব্রত রায়সহ আরো কয়েকজন এটির বিরোধিতা করেন ও বাকীরা মৌন সম্মতি জানান ফলে প্রস্তাবটি বাতিল হয়ে যায়।





এরপর মো : মুশফিকুর রহমান, আলী হায়দার খান (তন্ময়) প্রস্তাবিত ৯ জন প্রার্থীর ওপর ভোট গ্রহণের প্রস্তাব করেন। সভার সভাপতি এই প্রস্তাবটি গ্রহণ করা হবে কিনা তা উপস্থিত সদস্যদের কাছে জানতে চান এবং ২৪ জন সদস্য প্রস্তাবটি গ্রহণের পক্ষে সমর্থন জানান। পরবর্তীতে সভাপতি, আলী হায়দার খান (তন্ময়) এর প্রস্তাবিত ৯ জন প্রার্থীকে সমর্থনের পক্ষে মৌখিক সম্মতির আহবান করেন এবং উপস্থিত সদস্যদের মধ্যে ২২ জন, নির্বাহী পরিষদের সদস্য হিসেবে এই ৯ জনকে সমর্থন জানান।

এর মাধ্যমে ২০১৬ - ২০১৮ মেয়াদের জন্য উইকিমিডিয়া বাংলাদেশের নির্বাহী পরিষদের ৯ জন সদস্য হিসেবে,

১. মুনির হাসান,
২. তানভির রহমান,
৩. তানভির মোর্শেদ,
৪. নুরুন্নবী চৌধুরী (হাছিব),
৫. নাহিদ সুলতান,
৬. শাবাব মুস্তাফা,
৭. এ.কে. আল মহিউদ্দিন (মহীন রিয়াদ),
৮. মাসুম আল হাসান (রকি), এবং
৯. আলী হায়দার খান (তন্ময়) নির্বাচিত হন।

উপস্থিত সদস্যগণ করতালির মাধ্যমে নতুন নির্বাহী পরিষদকে স্বাগত জানান ও পরিষদ অনুমোদন করেন।

#### ৫. বিবিধ আলোচনা :

শাবাব মুস্তাফা : নতুন নির্বাহী পরিষদের জন্য একটি উপদেষ্টা কমিটি করণের প্রস্তাব করেন।

মুনির হাসান : যেহেতু বিষয়টি আমাদের গঠনতন্ত্র বা বাইলজে নাই, সেহেতু পরবর্তি নির্বাহী পরিষদের সভায় আলোচনা করে তা চূড়ান্ত করলে ভাল হয় বলে মত দেন। এছাড়াও তিনি বিভিন্ন সময় উইকিমিডিয়া বাংলাদেশের কার্যক্রমে সাহায্য সহযোগিতা করায় বিভিন্ন ব্যক্তি ও প্রতিষ্ঠানকে ধন্যবাদ দেওয়ার জন্য ধন্যবাদ প্রস্তাব করেন ও উপস্থিত সদস্যগণ সেটি হ্যাঁ-সূচক জবাবে অনুমোদন করেন।

৬. সাধারণ সভায় গৃহীত সিদ্ধান্তবলী : সংগঠনের প্রথম বার্ষিক সাধারণ সভা

- ২০১১ সাল থেকে ২০১৫ সাল পর্যন্ত প্রতিষ্ঠানের কার্যাবলী এবং এর আর্থিক বিবরণী অনুমোদন করে,
- সাধারণ সম্পাদকের অনুপস্থিতিতে সদস্য শাবাব মুস্তাফাকে ব্যাংক একাউন্টে যুক্ত করার জন্য নির্বাহী পরিষদের সভা অনুমোদন করে,
- বাংলা উইকিপিডিয়ার বিভিন্ন উপলক্ষে আয়োজিত কর্মকাণ্ডে পৃষ্ঠপোষকতা করার জন্য নিম্নোক্ত ধন্যবাদ প্রস্তাব গ্রহণ করে,
- উইকিমিডিয়া বাংলাদেশের বিভিন্ন কর্মকাণ্ডে সাহায্য সহযোগিতা করায় উইকিমিডিয়া ফাউন্ডেশনকে ধন্যবাদ দেওয়া হয়,



**WIKIMEDIA  
BANGLADESH**

- বিভিন্ন সময় ভেন্যু সংক্রান্ত ও অন্যান্য সাহায্যে এগিয়ে আসায় বাংলাদেশ ওপেন সোর্স নেটওয়ার্ক (বিডিওএসএন) ও বাংলাদেশ অ্যাসোসিয়েশন অব সফটওয়্যার অ্যান্ড ইনফরমেশন সার্ভিসেসকে (বেসিস) ধন্যবাদ জ্ঞাপন করা হয়,
- ইউনিভার্সিটি অব ইনফরমেশন টেকনোলজি এন্ড সায়েন্সেস, ড্যাফোডিল ইন্টারনেশনাল ইউনিভার্সিটি, ওয়ার্ল্ড ইউনিভার্সিটি বাংলাদেশ, রাজশাহী বিশ্ববিদ্যালয়সহ উইকিমিডিয়া বাংলাদেশের কর্মকাণ্ডে সহযোগিতা করার জন্য সকল শিক্ষাপ্রতিষ্ঠান ও এর সাথে সংশ্লিষ্টদের ধন্যবাদ দেওয়া হয়,
- বিশেষ ধন্যবাদ জ্ঞাপন করা হয় গ্রামীণফোনকে, বাংলা উইকিপিডিয়ার দশম প্রতিষ্ঠাবার্ষিকীর অনুষ্ঠানে পৃষ্ঠপোষকতা করায় ও বিভিন্ন সময় উইকিপিডিয়ার কর্মকাণ্ডে সহযোগিতা করায়,
- এছাড়াও উইকিপিডিয়ার প্রচারে বিভিন্ন সময় বিভিন্ন সংবাদ প্রকাশের জন্য দেশের সবকটি সংবাদমাধ্যমকে ধন্যবাদ দেওয়া হয়।

নিম্নোক্ত ৯ জন সদস্য নিয়ে ২০১৬-২০১৮ সালের জন্য নির্বাহী কমিটি গঠন অনুমোদন করে,

১. মুনির হাসান,
২. তানভির রহমান,
৩. তানভির মোর্শেদ,
৪. নুরুন্নবী চৌধুরী (হাছিব),
৫. নাহিদ সুলতান,
৬. শাবাব মুস্তফা,
৭. এ.কে. আল মহিউদ্দিন (মহীন রিয়াদ),
৮. মাসুম আল হাসান (রকি), এবং
৯. আলী হায়দার খান (তন্ময়)।

বার্ষিক সভায় আলোচিত বিভিন্ন প্রস্তাব নির্বাহী পরিষদের সভায় যথাযথ গুরুত্বের সঙ্গে বিবেচনা করে ২০১৬ সালের কর্মপরিকল্পনা গ্রহণের জন্য নির্বাহী পরিষদকে ক্ষমতা অর্পন করে।

**৬. সমাপনী বক্তব্য :**

সভার সভাপতি ও নবনির্বাচিত নির্বাহী পরিষদের একজন সদস্য হিসেবে মুনির হাসান সবাইকে ধন্যবাদ জ্ঞাপন করে বিকাল ৫টা ২০ মিনিটে প্রথম বার্ষিক সাধারণ সভার সমাপ্তি ঘোষণা করেন।

সভাপতি

১৫/০২/২০১৬



পরিশিষ্ট :

ক :

[https://commons.wikimedia.org/wiki/File:WMBD%27s\\_first\\_AGM-\\_member%27s\\_signature.pdf](https://commons.wikimedia.org/wiki/File:WMBD%27s_first_AGM-_member%27s_signature.pdf)

খ :

- \* [https://meta.wikimedia.org/wiki/Wikimedia\\_chapters/Reports/Wikimedia\\_Bangladesh/2011](https://meta.wikimedia.org/wiki/Wikimedia_chapters/Reports/Wikimedia_Bangladesh/2011)
- \* [https://meta.wikimedia.org/wiki/Wikimedia\\_chapters/Reports/Wikimedia\\_Bangladesh/2012](https://meta.wikimedia.org/wiki/Wikimedia_chapters/Reports/Wikimedia_Bangladesh/2012)
- \* [https://meta.wikimedia.org/wiki/Wikimedia\\_chapters/Reports/Wikimedia\\_Bangladesh/2013](https://meta.wikimedia.org/wiki/Wikimedia_chapters/Reports/Wikimedia_Bangladesh/2013)
- \* [https://meta.wikimedia.org/wiki/Wikimedia\\_chapters/Reports/Wikimedia\\_Bangladesh/2014](https://meta.wikimedia.org/wiki/Wikimedia_chapters/Reports/Wikimedia_Bangladesh/2014)
- \* [https://meta.wikimedia.org/wiki/Wikimedia\\_chapters/Reports/Wikimedia\\_Bangladesh/2015](https://meta.wikimedia.org/wiki/Wikimedia_chapters/Reports/Wikimedia_Bangladesh/2015)

গ :

\* [https://meta.wikimedia.org/wiki/Wikimedia\\_Bangladesh/MoA](https://meta.wikimedia.org/wiki/Wikimedia_Bangladesh/MoA)

A handwritten signature in black ink, appearing to be a stylized name or initials.